

Na: Direktiva i Konseho di Partido Demokrátiko Boneriano
Atn: *Presidente Jessy Crestian*
Kralendijk, Bonaire

15 di Mei 2017

Tópico: Posishon independiente den Konseho Insular

Apresiabel Presidente,

Manera konosí pa Presidente, pa mas ku un año tin un estorbo den e relashon profesional di vários miembro prominente di nos organisashon político i nos lider político i frakshon señor Robby Beukenboom. Den vários forma a hasi intento pa yega na resolvé esaki. Na mas okashon kolega Pieters a ekspresá asta por eskrito sierito preokupashon pa loke ta funshonamentu di Frakshon di Demokrat i su lider di Frakshon, ku e deseo pa nan wòrdú atendé pa nos direktiva i/of den konseho di partido.

Lástima ta ku kolega Pieters te awe no a risibí un kontesta ni reakshon klaro riba contenido di su kartanan. Na sierito momento lider di frakshon, señor Beukenboom a indiká na kolega Pieters ku si e tin problema ku su liderato den Frakshon, e ta proponé pa señor Pieters bira lider di Frakshon. Señor Pieters riba su turno a indiká di ta dispuesto di akzeptá e proposishon aki bou di kondishon ku esaki tin sosten di nos partido i ta sugerí un reunion general pa sondeo sosten pa e proposishon aki serka nos miembrosia. Señor Beukenboom ta nenga esaki sin mas.

E situashon a kontinuá i eskala di tal forma ku kolega Pieters ta skohe pa tene honor na su mes i ta tuma retiro di Konseho Insular debí ku e no por funshoná optimalmente como representante di Pueblo den e forma i esfera krea pa señor Beukenboom.

Ku retiro di kolega Pieters, mi persona como kabesante di Lista a risibí invitashon pa drenta den Konseho Insular. Siendo ku e responsabilidat elektoral di elekshon último riba mi lomba i e nesesidatnan grandi vigente den nos komunitat, sin mas mi a skohe pa tuma enkargo di e responsabilidat.

Ta hopi tabata e pregunta i preokupashonnan de vários hende ku ta aserka mi persona, ta kon ta bai traha huntu den frakshon si e esfera i forma di operá di señor Beukenboom keda meskos. Semper mi kontesta tabata ku nos lo inisiá ku bista pa dilanti i na un manera profesional lo intentá di pone kos funshoná.

Pa mi sorpresa i disgustu, riba dia 9 di mei na mi promé reunion bek den Konseho Insular, señor Beukenboom ta skohe di usa su tempu di disertashon pa deskredita i inisiá un atake frontal riba su propio kolega di frakshon saliente i nos kolega miembro di partido señor Michael Pieters. Un kolega ku apesar di diferensia di opinion i desacuerdo riba liña di pensamentu, a skohe di mantené honor na su mes i entrega su asiento bek na e Partido di kual e ta miembro. Un akto ku den e realidat i akontesimentu político di nos Isla ta algu di respetá. Ta un forma hopi baho pa ataka bo propio kolega ku ya no ta miembro mas di Konseho Insular i por sierito no por defendé su mes.

Mesun anochi den sala, mi a aserka señora presidente ku tabata presente pa mi huramentashon, ku e petishon pa nos por topa i papia riba kon tin ku sigui awor. Señora presidente a indiká di tin ku bai eksterior i dia señora presidente regresá, nos por topa pa deliberá i palabra kon pa sigui.

Mientrastantu un reunion di frakshon a wòrdú konvoká pa e siguiente dia, den kual reunion mi persona entre otro a kuestioná señor Beukenboom riba aktitut desrespetuoso i alabes e forma denigrante ku e ta trata i ekspresá su mes (públikamente) pa ku demas kolega i mi persona. Na lugá di akzeptá òf pidi diskulpa pa su akto bergonsoso, ku a wòrdú transmití riba radio i ta hasta graba, sr. Beukenboom ta desmentí esaki. Mi a informá señor Beukenboom ku mi persona den e forma aki no tin konfiansa den su liderato di nos frakshon i ku mi lo sondia kon mihó kontinuá. Mi intenshon pa ku e periodo aki tabata pa warda riba regreso di Presidente pa asina huntu wak kon nos por resolvé e situashon reinante.

Pa mi sorpresa, riba djabièrnè último señor Robby Beukenboom ta skohe pa bai radio i presentá un kantidat di mentira i akusashonnan sin base riba kolega Pieters i mi persona. Señor Beukenboom a hasta skohe di bai asina leu di insinuá ku señor Pieters i mi persona a negoshá tras di su lomba i di nos direktiva pa forma gobièrnu.

Un gran mentira, pasombra manera presidente mes a konfirmá mas ku un biahá den nos reunion di direktiva den presensia di señor Beukenboom, ku mi persona a informá señora Presidente mesora ku siendo di bishita na Statia, nos a topa i kombersá ku nos kolega sra. Coffie. Esma, ta mi mes persona a pidi un kompatriota presente pa saka un potrèt di nos huntu, ku na mes momentu mi a manda pa nos presidente.

E forma denigrante i e nivel ku señor Beukenboom ta skohe di bai, esta entre otro, krea i ekspresá mentira i trata na difamá kolega i kompañeronan di frakshon i di partido públikamente i den media a baha na un nivel rèkort.

Fin di siman ku a pasa, mi a sondeo mi konsensi i buska konseho serka esnan ku ta mas serka di mi. Pa mas kuantu mi kier buska resolushon den nos frakshon. Lastimá ku e aktitut, forma di proseder i nivel di sr. Robby Beukenboom mi no ta mira espasio pa ni ku intermediashon nos yega na un resolushon pa por traha i koperá ku otro. Un relashon, sea personal òf profeshonal, ta basa riba rèspect i konfiansa mutuo i esakinan no ta presente. Pa ta klaro, despues di tur e labatiba di e último dos aña nan aki, mi no a resta ni un krenchi di konfiansa mas den señor Robby Beukenboom.

Mi a drenta Konseho Insular pa representá mi Pueblo i su interes. Teniendo na kuenta tur e tópicos di atenshon i retonan inmenso ku ta asotá nos Isla, mi no por permití pa pèrdè tempu pa atendé ku aktitut infantil i disputa interno kontinuo ku no ta sirbi nos pueblo ku nada. Pa mi por ehrsé mi responsabilidat ku e pueblo aki a pone riba mi skouder i pa representá pueblo su interes na un manera digno, no ta resta mi niun otro opshon ku tuma un posishon independiente den Konseho Insular di Boneiru.

Tumando nota di e responsabilidat público di e funshon ku nos ta ehrsé como miembro di konseho insular i e deber ku nos tin di informá nos miembro i votadornan, e karta na Direktiva i Konseho di Partido aki lo ser poné na disposision di medionan di prensa i público general.

Mi ta spera di a informá suficiente i ta keda,

Atentamente,



Clark C. A. Abraham

Cc: Frakshon Demokrat, Prensa;